

畿

輔

安

瀾

志

畿輔安瀾志

大陸澤卷上

原委

大陸澤卷下

附載

隄防

橋渡

祠廟

水利

畿輔安瀾志

大陸澤卷上

原委

大陸澤在順德府任縣東北二十里卽禹貢所謂大陸既作者也古廣阿澤亦作廣河澤一名泰陸水一名鉅鹿澤一名大麓澤亦作大鹿澤一名大阿澤一名沃州俗名張家泊又對寧晉泊而言則名南泊以

其在縣之東又名小東湖南北袤三十里東西廣
十三里

山海經敦與之山淳水出於其陽而東流注於秦
陸之水郭璞註大陸水今鉅鹿北廣河澤卽其水

謹案廣河或
刻作廣平誤

爾雅晉有大陸郭璞註今鉅鹿北

廣河澤是也邢昺疏孫炎曰廣河猶大陸以地名
言之近爲是也禹貢冀州云大陸旣作是也
氏春秋九藪趙之鉅鹿高誘註卽廣河澤也 史

記正義大陸澤在邢州 前漢書地理志鉅鹿禹

貢大陸澤在北 後漢書郡國志鉅鹿故大陸有

大陸澤 水經注衡水又北逕鉅鹿縣故城東應

劭曰鹿林之大者也尚書曰堯將禪舜納之大麓

之野烈風雷雨不迷致之以昭華之玉而縣取目

焉 謹案此是緯書道元引之 魏書地形志鉅鹿郡瘦陶有沃

州城 元和郡縣志鉅鹿澤在縣西北東西廣二

十里南北三十里 謹案里數與今不同今據乾隆十三年查丈之數 葭葦

魚蟹之利充牣其中澤畔又有鹽泉煮而成鹽百

姓資之昭慶縣

謹案漢廣阿

廣阿澤在縣東二十

五里卽大陸別名鹿城縣

謹案今東鹿縣

大陸澤在縣南

十里陸澤縣三里卽大陸之澤

謹案陸澤縣本漢下博縣故城今深

州

太平寰宇記廣阿澤一名大陸一名鉅鹿一

名大麓一名沃州尚書曰恒衛旣從大陸旣作鄭

康成註云大陸澤在鉅鹿案漢鉅鹿今平鄉也十

三州志云淮南九藪趙有鉅鹿今其地卽廣河澤

也 馬端臨文獻通考大陸大鹿大河一澤異名

胡渭禹貢錐指冀州有三大陸一在鉅鹿郡北

禹貢之大陸也一在河內修武縣

其故城在今
獲嘉縣西北

傳定公元年魏獻子田於大陸還卒於甯杜預云

大陸疑卽吳澤陂近甯是也一在太原鄆縣

今爲
介休

縣班固云九澤在縣北是爲昭餘祁并州藪鄆道

元云呂氏春秋謂之大陸是也斯二者皆非禹貢

之大陸也今案呂覽九藪旣云晉之大陸又云趙

之鉅鹿如謂大鹿卽鉅鹿則一澤不應兩見故道
元以鄔澤當之蓋晉爲唐叔始封大陸宜在其境
內而鉅鹿當戰國時實爲趙地故分爲二澤也然
晉之大陸在漢大陵縣界陸恐是陵字之誤蔡傳
引程氏曰大陸云者四無山阜曠然平地杜佑李
吉甫以爲邢趙深三州之地者得之今案漢志鉅
鹿縣禹貢大陸澤在北一而已而唐人所言不一
通典有二趙州昭慶隋爲大陸縣有大陸澤深州

陸澤有禹貢大陸澤是也元和志有四邢州鉅鹿縣西趙州昭慶縣東深州鹿城縣南又陸澤縣南故程恭之謂以邢趙深三州之地爲大陸自杜李始竊謂唐鉅鹿縣東境亦漢鉅鹿縣地澤在西北接昭慶界蓋一澤跨二縣之境卽班固所云在鉅鹿縣北孫炎所云今鉅鹿縣廣河澤者也而志家惟以平鄉爲古鉅鹿求此澤而不得遂言今盡爲邱壠豈知元和志獨詳於鉅鹿原不在平鄉界耶

宋河渠志大觀元年河決陷鉅鹿縣遷縣於高地
又以隆平下濕亦遷之則二縣地勢最卑澤在其
間明矣大陸在邢趙二州界而深不與焉傅同叔
云凡廣河澤以東其地平廣綿延千里皆謂之水
陸是瀛滄亦大陸矣河自大陸又北始播爲九河
誠如傳言則許商所謂九河自禹以北至徒駭間
相去二百餘里者將何所容其地耶又張懷忠大
陸澤水治圖記張家泊辨大陸澤一名張家泊其

來舊矣好事者競誣爲誤書張從漳且實其辭曰
漳家泊者以漳水而得名也漳水古未入任止名
大陸澤自明萬歷間漳河支水始由廣平曲周入
任汜濫至今六七十載土人因名漳家泊世俗乃
傳爲張者誤之甚也爲漳之證者如此張家泊縣
志書載甚明縣志作於隆慶之元年已載張家泊
隆慶前萬歷一代豈古人預知漳水之入任而先
誤設此名以待後人駁正乎夫古人以人名地皆

適然之辭後人因其泊而泊之則亦因張家而張

家之卽如今之牛家曰劉累河之類是也且漳者

水也非人非氏家之義又何云乎

謹案漢置任縣及張縣俱廣平

國後漢省張縣以任縣屬鉅鹿郡張家泊豈因張縣而以縣爲家耶則張之得名古矣

謹案禹貢大陸爲河所經故一曰大陸旣作一曰

至於大陸其不言澤者舉澤不足以概大陸舉大

陸則澤在中省文也爾雅曰廣平曰陸河逕廣平

之地潞而爲澤故又曰廣河澤畿輔通志謂詳釋

經文大陸既作其義與雲土夢作又同孔氏翼傳
所云地可耕作猶荆傳所云水去而地可耕作原
不以大陸爲非澤也此說得之通志又謂水勢變
遷涸溢靡定卽以今大陸言之當水發時洪濤浩
渺一望無際及其既去疏流修堰污泥橫潦悉爲
膏壤以今準古又何疑焉說又不然夫經所謂大
陸既作者謂當洪水滔天時澤與陸混爲一水自
禹功既施恒衛既治然後水歸於澤而大陸之地

遂可畊作非謂澤盡成陸皆可畝也若以今準古則所謂大陸澤十不一存徒名具耳通典元和志以爲在形趙深三州之地以今地理考之當起於鉅鹿訖於東鹿中跨平鄉任縣隆平寧晉深州東鹿諸境魏書韓均傳廣阿澤在定冀相三州界新唐書地理志鉅鹿縣有大陸澤蓋大鉅同義一澤二名是鉅鹿本以澤名縣文獻通考平鄉古大陸野今縣城卽古鉅鹿治任縣前漢屬廣平後漢

屬鉅鹿郡又漢置廣阿縣隋更名大陸縣卽今隆平縣地唐置陸澤縣卽今深州皆以澤爲名元和志深州鹿城縣大陸澤在縣南十里卽今束鹿縣漢書地理志饒陶屬鉅鹿唐改寧晉方輿紀要胡盧河在寧晉縣東南二十里卽禹貢大陸澤俗所謂寧晉泊者也畿輔地圖記大陸澤在任縣鉅鹿隆平寧晉一帶蓋河經大陸之地緒而爲澤其廣袤如此今鉅鹿平鄉深州束鹿皆成平陸止任寧

二邑又分爲二南泊在任北泊在寧晉其在寧晉者三倍於任而大陸澤之名獨歸之任殆流俗之訛也

入澤之河

洛河源出山西遼州太行山中東南流逕河南武安縣入邯鄲西北境二川雙導遶紫山之北一名易水一名南易水一名漳水一名千步水蓋古淺水也

漢書地理志魏郡武安有淺水東北至東昌入滹

沱過郡五行六百一里 史記趙世家趙使趙奢

將兵擊秦大破秦軍閼與下賜號馬服君正義曰

因馬服山爲號也括地志云馬服山在邯鄲縣西

北十里

謹案方輿紀要名勝志一統志皆以上有趙奢塚故名馬服山是山反以奢而得名

也非

隋書地理志臨洛有紫山 方輿紀要紫

山卽邯鄲縣西北三十里亦謂之馬服山也

謹案

又云漢志註邯鄲縣有堵山牛首水所出酈註以爲卽紫山也水經注無此文當是誤引也

元和郡縣志磁州武安縣東南至州九十里洛水

西去縣八十三里武安故城在縣西南五里太
平寰宇記武安縣洛水本名漳水源出縣西北三
門山山下去縣八十三里水經注云洛水出易陽
縣西山永年縣馬服岡史記趙奢爲馬服君受封
於此風土記云南易水本名漳水源出三門山趙
地記云六國時此水名易水埤蒼及水經云洛水
之目不知誰改俗謂山之下地名洛故曰洛水案
燕趙記云其分有三易漳爲南易 徐堅初學記

邠州水經注云洛水一名漳水俗名千步一統志北洛出武安縣西北門道川東流經縣北南洛出縣西白草坪東流經縣南又東北合流入直隸邯鄲縣界遶紫山之北永地記圖註清淇蕩洹以北漳爲大漳之北滹沱之南今之川流溢爲大於古則浸爲大考之漢志漳至阜城入大河白渠水浸水皆出武安白渠至列入入漳至東昌入滹沱列入今肥鄉境東昌今武邑境阜城與武邑接

界而武邑在西阜城在東是瘦水東北注行於白
渠之北漳水之西泉出武安流逕漳水西貫大陸
澤達滹沱者舍沼水固無他水矣參考漢志及說
文解字馮水出襄國西山至任入瘦而襄國又有
澆水參水馮水中邱逢山長谷有渚水皆入馮襄
國合邢臺境中邱今內邱境馮水今俗呼野河下
游兼沙河澆水卽狼溝河蓼水卽達泉河馮水今
俗呼白馬河渚水卽沙溝水水經注有濁漳篇有

馮醴通爲衡漳之語醴卽邢臺之七里河逕南和
之北者山海經敦與之山澆水出於其陽泝水出
於其陰澆水卽龍驤水今俗呼小馬河泝澆二源
遠在渚水之西渚水出其東行於二水間今竝入
大陸澤而漢時遞相灌輸以入於寢以地里考之
南自漳水以次而北曰滏水曰白渠水曰寢水曰
馮水曰澆水曰醴水曰蓼水曰馮水曰澆水曰渚
水又北則入寧晉泊之泝水今滏水所經邯鄲之

東南境則絕白渠而北邯鄲之東北境以往則由
洛水故道而微有遷徙洛水蓋改流而北非復昔
時纏絡也

謹案易水有三曰中易北易南易南易者古雹河
也源出易州西南六十里郎山後漢郡國志涿郡
故安雹水出前漢書地理志易陽屬趙國師古曰
在易水之陽應劭曰易水出涿郡故安則是易陽
之得名固以易水而前漢志所謂故安之易水卽

後漢志所謂故安之澗水也而寰宇記以洛水爲
易水且以爲南易隋書地理志武安卽臨洛縣舊
曰易陽方輿紀要臨洛城廣平府西四十里本漢
之易陽縣屬趙國一統志臨洛故城在永年縣西
十五里漢置易陽縣於是易陽之易卽臨洛之洛
矣夫以武安爲卽臨洛是也而以臨洛爲卽易陽
則武安豈有易耶易水與洛水自是二水易水遠
在涿郡與洛水南北隔絕易何嘗越千里而一至

於武安耶抑豈洛水之名係屬後起信如寰宇記
所引趙地記云六國時此水本名易水耶是則易
水有四易不止三易矣姑存其說可耳又史記正
義引括地志濁漳水在邢州平鄉縣南又引水經
注云漳水一名大漳水兼有寢水之目也水經注
無此文蓋逸文也又正義曰邯鄲洛州縣也漳水
源出洛州武安縣三門山則是皆以寢水爲漳水
也前漢志以寢水出武安元和志以洛水出武安

縣三門山寰宇記以洛水本名漳水源出三門山
方輿紀要洛水源出山西遼州界太行山中經河
南武安縣則是洛水本爲澗水也而徐堅初學記
邢州下引水經注云洛水一名漳水俗名千步水
經注無此文亦豈逸文耶考漢志武安白渠水入
漳澗水入滹沱則澗水非漳水元和志雜澤洛漳
二水在縣東南二十五里合流東入平鄉界方輿
紀要縣東二十里有漳河隄亦曰漳洛南隄意二

水變徙合注互受通稱其來久矣要之洛與漳本
爲二水以其合注故洛得名漳然不可以名易至
洛之爲寢則無疑也金史地理志寧晉縣有寢水
縣志以滹沱漫流之臧河當之而引漢志寢水以
証之非也

二川合而東北入永年縣西北境又東北流逕狗山
北

金史地理志永年有洛水 明史地理志永年有

洛水自河南武安縣流入 太平寰宇記狗山在
臨洛縣四十里山頂有狗跡因名 永年縣志一
名駐蹕山一名太宗山有石刻曰唐太宗討劉黑
闥君臣會飲於此

謹案通鑑唐記高祖武德五年世民進軍肥鄉烈
營洛水之上胡三省註水經洛水東逕曲梁城曲
梁卽永年洛水非所治也今本水經無之蓋佚篇
也一統志曲梁故城今永年治高齊有曲梁置廣

年縣隋仁壽元年改廣年爲永年避煬帝諱也

又東流十里逕臨洛關北又東流十四里逕龍泉村
又東流二十里逕茹佐村

元和郡縣志洛州臨洛縣東南至州五十里本漢
易陽縣地北濱洛水因以爲名 通志易陽故城

在府城西亦名臨洛城 方輿紀要臨洛城本漢
之易陽縣范成大北使錄臨洛城東至洛州三十
五里以北濱洛水而名自此過洛河三十里至沙

河縣是也

謹案胡三省通鑑註案地理志及郡國志易陽縣屬趙國師古及賢皆承應劭之誤易水在燕南界漢屬河間郡界此時趙國僅有唐邢洛二州之地安得屬縣遠在易水之陽耶五代史志洛州臨洛縣舊曰易陽後齊廢入襄國縣後周改爲易陽縣別置襄國縣隋開皇六年改易陽爲邯鄲縣十年改邯鄲爲臨洛而別置邯鄲由是觀之漢易陽縣

當在襄國邯鄲二縣之間此辨甚明元和志但言
臨洛本漢易陽縣地亦不云卽易陽舊縣但易水
並非所經何以遠取於易而名易陽而洛之稱易
豈土俗之譌自古已然昔人以爲易陽而後世乃
從而正之曰臨洛歟古今水道變遷多不可考此
尤無確証者也

又東北流二十里逕辛莊堡入雞澤縣西南界又東
北流逕浮屠店得沙河故津

元和郡縣志洛州雞澤縣西南至州五十里洛漳
二水在縣東南二十五里合流東北入平鄉縣界
〔金史地理志〕雞澤有洛水 明史地理志雞澤
西有洛河又有沙河自南來 〔天陸澤水治圖記〕
洛河由臨洛關至雞澤縣浮屠店東北與沙河合
流下爲沙洛河 二統志洛河東北經雞澤縣西
五里

謹案元和志洛水在永年縣南三十里又云洛漳

三水至雞澤縣東南二十五里合流今自承年縣西北又逕雞澤西北至南和蓋今昔異流矣又唐宋時洛水於縣之東南合漳其後徙流於縣西南十里之浮屠店沙河溢水則由其故道與漳合今沙河改而西不與洛合漳亦不至縣之東境矣

折而北流逕雞澤縣西小韓固入南和縣東南界又北流十里逕善友村又北流二十里逕高村入任縣東南界又西北流三十二里逕尼家莊入於大陸澤

天陸澤水泊圖記洛河經南和縣之北高村迤西
入任縣至石家溝入滄陽河北高村至望馬臺八
百丈望馬臺至象家寨五百三十丈象家寨至王
家莊一百八十丈王家莊至吳家莊五百八十丈
吳家莊至安上村三百五十丈安上村至於明莊
四百二十丈於明莊至馬家莊三百七十丈馬家
莊至尼家莊二百七十丈尼家莊至甄莊場三百
六十丈甄莊場至石家溝一千一百八十丈

劉累河以逕劉累村得名滏陽河支流也一名小漳
河一名舊滏河一名牛尾河滏陽河東北流至廣平
府治西南其北岸爲閘九九閘之水渙流散積滙爲
大川東北流繞府城而東折而北流逕下堡店入雞
澤縣南境又北流逕雞澤縣城西又北流逕馬坊縣
營入南和縣東南境折而東北流三車入平鄉縣西
境又折而西北流二里逕辛寨村復入南和縣東境
又折而東北流二十里逕史家村入任縣東南境又

東北流五里逕劉累村又折而西北流二十三里逕
尾家莊合於沙洛河入大陸澤

〔大陸澤水治圖記〕劉累河滄陽河支流也一名小
漳河起於廣平府西南間村闡胡賈等村引水泛
溢環府北隄外東下〔雞澤縣志〕牛尾河一名小

河俗名出水溝明嘉靖十二年知府李騰霄開鑿
入縣至六方村河道紆曲不能蓄水泛溢爲患康
熙七年姜焯相度形勢自馮鄭村至亭自頭濬新

河二里許六方等村永無水患

謹案劉果河南和縣志以爲洛河分流一名洛漠
河卽古溥洛津平鄉縣志洛漠水在城西五里洛
河分流也下合溢水通志府志大陸澤水治圖記
皆以爲溢陽河分流今是河惟上承永年縣溢之
左岸諸閘似言洛河者非也然考杜秉彝濟民閘
記云渠開自西閘村由馬道固營達小張村溝分
四十有六仍於右路濬太溝直抵洛河越四十里

以洩餘水則必洛水支津舊跡實在此又往時漳河決入滏河其別支由廣平北流故有小漳之名以別於漳又元引滏水分灌洛州城濠以濟民用故又有舊滏之名以別於洛至牛尾河之稱則因達活泉有是稱而說者也又水經注漳水歷經縣故城西有故津謂之薄落津洛漠燕薄落之譌也方輿紀要落漠水近爲漳洛諸流所併非復故渠是也乾隆二十八年水利奏畧牛尾河歷廣潤

水府消納永年雞澤南和平鄉諸縣源水經任縣
太大陸澤共長一百六十七里河身間段淺窄應
加挑濬今估展面底河身各加寬深約估需銀五
萬五千四百七十八兩

沙河源出山西遼州城內名渴水自遼州分流入直
隸順德府沙河縣西北一自大嶺口東南流十里出
自黃背口東北流十里會於縣西

漢書地理志趙國襄國縣西山渠水所出

謹案渠
當作陂

東北至任入寢師古曰渴音藕 許氏說文解字
渴水出趙國襄國之西山東北入寢 太平寰宇
記沙河卽渴水也在沙河縣西北七十一里 文
獻通考邢州龍岡有蓼水渴水

謹案大嶺口在沙河縣西一百四十里石盆村西
北十餘里其外卽邢臺境高背巖在縣西一百五
十里石盆村西南二十里許其外卽武安境石盆
村去縣一百三十里

曲折東流於山谷中凡六十里逕廣陽山下之渡口
村又東流二十里逕左村邢臺之野河來會合流而
東凡三十里遇大沙磧分爲二其一繞磧東北流二
十里逕縣城南又東流十五里逕段狼溝河入焉又
東南流十五里逕宋村唐相宋璟故里入南和縣西南境爲
澧河見另其一繞磧東南流三十里逕普通鋪俗名普
通河又東南流二十里逕田村入永年縣西北境又
東流逕鄭厯村入雞澤縣西南境屈而北流逕浮屠

店分爲三支左支名岔河右一支名小裏河俱北流
入焉東北流逕韓固營入南和縣東南境俗名乾河
一名沙洛河又名新沙河又名程寨河

〔畿輔通志〕程寨河沙河支流也一曰新沙河 南
和縣志乾河卽沙河南支正流也河水獨見於秋
他時皆涸故名 在縣志沙河平雞澤縣浮屠店
東北與洛河合下爲沙洛河

東北流十里逕宋家莊又北流二十里逕郝橋鎮東

文入往縣東南境又南而西北流六里逕駱莊又北
流十里逕東盟臺入於大陸澤

畿輔通志任縣東三十五里相傳韓信襲齊與楚
將龍淮會盟於此

謹案沙河至沙邑西南分南北二支均以南和歸
大陸澤惟南支又逕永安澤澤行遠而長要爲正
流北支則支流也方輿紀要沙河自順德府沙河
縣流逕雞澤縣又東南流至廣平府境合於洛河

復東北流入平鄉縣境又云雞澤縣西南二十里
沙河自沙河縣東南流逕縣境達永年縣界合於
洛河復自縣境東北而入平鄉縣界是則南支
爲沙河正流明甚今沙河在雞澤縣西南十里亦
不與洛河合而平鄉縣境更無沙河逕流蓋其流
又轉而西矣其自雞澤以北或曰沙洛河或曰程
寨河通志與沙河並列爲三府志任縣志皆然大
陸澤水治圖記列沙河於九河列程寨於八水以

程寨爲沙河分支而於沙河則以爲發源洪河下
合沙河縣西北之溫泉至雞澤縣浮屠店與洛河
合爲沙洛河逕南和縣北高村迤西入任縣墻至
石家溝入滏陽河又於程寨河則曰一石新沙河
起自沙河縣南逕雞澤縣之柳下泊泊水合入至
南和縣回家莊候過村徐家莊郝橋村四處俱有
溝溝俱引澧水俱合入新沙河由郝橋六里入任
縣境三里至程二寨河以程寨名志害也轉西三

里至駱莊折北四里至遼家莊五里至東盟寨入
泊考今由雞澤逕南和回家莊侯過村徐家莊郝
橋村入任縣境至東盟臺入大陸澤者惟沙洛河
耳俗名乾河豈以其經程寨又名程二寨又名程
寨河耶以爲二河殊不可考通志又謂沙河分二
支一入廣平府雞澤縣至南和縣入任縣之東盟
者爲新沙河考今沙河二支一由沙河縣入南和
縣爲澧河一由廣平府之雞澤縣入南和縣爲沙

洛河又名新沙河初無二支俱入廣郡之說而沙
洛河卽新沙河亦不得分而爲二豈今昔之流而
隨遷歟又今水經云沙河又經鉅鹿隆平二縣至
寧晉縣滙爲大澤過冀州境西北三十里至武邑
縣北界三十里爲夾河迤阜城縣西北爲胡盧河
入於滹沱河與今河道全不合且沙河入任縣會
百泉河卽澧水貫大陸澤而出至寧晉縣入寧晉
泊流正於是寧晉泊而下爲胡盧河則昔時漳溢

會流之名非沙河所可當也

野河上源有四一烏梅河亦名荆村河俗名龍門川源出馬嶺口其在馬嶺北自內邱縣來者又有三川

第一川泚水

見另

發源胡姑腦北流入於唐山縣第二

川第三川俱發源婆婆庵二川分流而南邈縣西入龍門川龍門川又南會尹水川俗名稻畦川源出黃榆嶺又南會白岸川俗名漿水川源出清風嶺又南會轆轤川俗名路羅川其源二一出支鍋石名北路

羅一山路羅嶺俗名石峽嶺名南路羅四川滙流紆
曲於方山之中逕老蒼會合而東南流三十里逕栲
栳洪山又名洪河又東南流逕湯山湯水入焉一名
溫泉水

〔後漢書郡國志〕趙國易陽魏都賦曰湯泉毳涌而
自浪註湯泉在易陽世以治疾洗百病 太平寰

宇記湯山在沙河縣西北七十一里山海經云湯
山湯水出焉此湯能愈疾爲天下最 大陸澤水

治圖記沙河發源邢西栲栳洪山曰淇河 方輿
紀要野河在順德府西北百二十里發源百巖諸
山引流凡七十二道府西北一百三十里其地設
險有馬嶺口爲戍守要地黃榆嶺府西一百二十
里亦設險處 舊邢縣志支鍋石三峯並峙狀類
支鍋 內邱縣志第二川水發源自婆婆庵西天
井杏峪錦繡堂老人峯至潮厓會西來馬嶺水東
至侯家莊出龍門東南入青山村又東爲邢臺縣

之荆村河

謹案野河上承諸澗谷晴則乾涸雨則泛溢不可
悉數故有七十二道之說又洪河一作紅河大陸
澤水治圖記以爲沙河之源沙河縣志疑紅河爲
卽澆水方輿紀要以沙河源出湯山一名馮水以
襄國西山爲卽湯山皆非也

狼溝河百泉河支流也今名西狼溝河在沙河縣東
南十八里首起邢臺縣之厰里村南流逕北須村南

俎村六房村留村段家莊計長十六里入於沙河

岔河在雞澤縣西南十里之浮屠店自沙河東岸分支北流逕西柳村至城隍村仍入於沙河

小裏河亦在雞澤縣西南浮屠店自沙河西岸分支北流逕南莊北莊高家莊至尼家莊仍入於沙河

魏郭橋河在沙河縣西北十八里發源邢臺縣南有二一自康莊之東一自廠里之西入縣境匯流而南逕九家村凡二里入於狼溝河

洛泉河在沙河縣東北卅八里發源於九家村葦地
一名九家泉東南流逕大村北留二村計長三十里
入於狼溝河

鬼谷溝在邢臺縣西北一百五十里馬嶺口相傳龐
涓夜渡處也東流入於野河

小青陽溝在邢臺縣西南一百二十里東流入於野
河

柳下泊在漢澤縣西南入於沙河

澧河其上流沙河也在南和縣西南東北流二十里
逕城南又東流十五里逕大趙鎮屈而北流二十五
里逕郝橋西入任縣東南境又北流十里逕臺南村
殷陳溝水東流入焉支流又北流二十里逕東盟臺
入於大陸澤

謹案明史地理志邢臺縣東南有百泉水其下流
爲澧河一名馮水補正水經注云百泉河入南和
縣爲澧河寰宇記百泉河在邢州東南八里是澧

河之北源也方輿紀要百泉蓋卽澧河之北源引
流而東入南和縣界又東北流逕任縣東入趙州
隆平縣而匯於胡盧河又云澧河在南和縣西十
里其上源卽百泉水也通志澧河在南和縣西十
里卽百泉河下流自邢臺縣流逕任縣界合洪河
東注任縣大陸澤考洪河卽野河在邢臺縣西南
五十里百泉河在邢臺東南十二里二河相去幾
及百里安得合流又洪河逕沙河縣西五十里之

左莊入沙河是入南和者沙河也非洪也謂澧河
至任縣合洪河任又安得有洪哉一統志澧河卽
百泉水也又曰任水以澧爲任未知何據吳懷忠
大陸澤水治圖記謂澧河發源府西路羅諸山其
源有二一自猪莊之北川來者曰烏梅河一自溫
泉之南川來者乃洪河分流也則似又以野河爲
澧水也今百泉下流無澧之名而沙河入南和縣
境土人多之曰澧河入任縣境又名南澧河北入

隆平縣境又名北澧河與諸書不符元史郭守敬傳陳水利六事其三順德澧河東至占任城失其故道沒民田千三百餘頃此水開修成河其田卽可耕種自小王村經滹沱合入御河通行舟楫其西磁州東北滏漳二水合流處引水出滏陽卽鄆洛州永年下經雞澤合入澧河可灌田三千餘頃是則澧水之大並於滏河而其上流殊未言及明統志謂澧水源自漳河分流蓋明時漳與澧合故

誤以漳爲源尤不足據吳懷忠謂沙河由南和入任者爲澧河由永平雞澤入南和者爲沙河亦未深考也考隋碑修澧水石橋記在南和縣城北韓村南和縣志謂當日河必經流於此不知何時轉徙而北碑詞云南和縣城之北有澧水焉其水上引七里之源旁吸百泉之口云云碑立於隋開皇十一年其說古矣是知澧爲百泉下流確然無可疑矣方輿紀要又謂澧河自邢臺縣流入南和縣

境漳水及沙洺諸水俱流合焉然則澧水百泉下
流因合沙故沙亦得通稱今百泉復與沙分流而
其稱反爲沙所奪古今水道變遷名亦隨易今所
叙次但據現在河形而言恐後無可考故詳辨之
又案寰宇記濁水一名澧水一名鴛鴦水俗謂
之百泉水源出縣東南平地以其導源衆泉合成
一川故也亦謂之鴛鴦水魏都賦所云鴛鴦交谷
此又似沙澧百泉同爲一水者水經注漳水篇其

水與滹澧通爲衡津則滹澧久自爲一或源不同
出而下流相合故得通稱則以澧爲沙之下流亦
無不可 又案近古之勢滏陽河爲大陸澤灌注
之通衢澧河爲大陸澤節宣之要道當宋末澧河
失其故道沒民田千三百餘頃元初郭守敬始議
開修明正德中任縣知縣張瓚復祖守敬議重濬
嘉靖中以頤德正定夫萬人濬治穆家口至羊毛
圪塔四十里澤水大治明末漳滏混流澧再淤沒

沿大陸澤被淹者三十三村

本朝順治中任縣知縣吳懷忠尋得河身再爲開濬雍正中怡賢親王大加修治濬北澧河以達寧晉泊民咸頌之今澧河淤高水反倒灌奪澤去路澧河亦日淤塞在南者不足以容諸河之水在北者不足以以洩大澤之水旱則盡成陸地潦則汪洋一片卽不旱不潦而民不獲澤之利常被水之患任民之耕植難以豐收古大陸澤名沃州者以其利溥

也今欲復其故非治溢澧不可而其功甚鉅蓋難言之

殷陳溝百泉河支流也百泉河入任縣境分支東流逕五花社村又東流逕達家莊入於澧河

寧召屯發源南河縣東北北流入任縣境又北流逕臺南村入殷陳溝

百泉河源出郡城東南十二里之百泉村從地涌出不可數記故以百泉名卽古灑水或云便水一名鴛

鴛水

〔漢書地理志〕廣平國南和列葭水東入滹師古曰
滹音斯 許氏說文解字滹水出趙國襄國東入
滹 〔隋書地理志〕龍岡舊曰襄國開皇九年改名
焉有滹水 〔太平寰宇記〕百泉河在邢州東南八
里水自平地而出其泉無數故曰百泉是滹河之
上源也鴛鴦水在南和縣北五里郡國志縣西有
鴛鴦水冬日常溫和又水經注云南和西官治東

有便水一名鴛鴦水又趙記云俗謂之百泉水是

也

謹案便水之名見於此所引水經注今本無此文

方輿紀要百泉

名渴水一名鴛鴦水隋志以爲澆水也

匯而爲淵廣周十餘畝其清可鑑分流爲三其一北
流數百步折而東流二里又分爲二俗名葫蘆套自
套而北者北流一里又分爲二一北流過沫耳闡入
於七里河一東流逕孔橋又屈而南流逕王快東市
入於七里河自套而南者折而東流又屈而北流逕

西樓下村又折而東南流逕北屋村又分爲二沃沙
河縣界一南流逕潘莊合於狼溝河一東南流六里
逕下善村亦入於狼溝河其一東流三里逕小廠村
又東流七里逕前樓下村過石橋亦分爲二瀉橋頭
東者折而北流三里入於七里河以下百泉北里互
受通稱矣又折而南流七里逕河會村又屈而東流
一里入南和縣西境又折而東北流八里逕河郭村
又北流五里逕小胡村又北流七里逕賈家村又東

北流七里逕王家村入任縣南境又東北流十五里逕臺南村又北流十五里至王路村入於大陸澤

謹案說文澆水入澗補正水經注以爲卽百泉河也沙河縣志謂今百泉正流東入南和而不入沙河境沙之河渠上承邢水之流者惟葫蘆套一河復自葫蘆套分支逕流沙邑者爲上河二河雖歷沙境均不關沙河况俱從北而南非自西而東與所謂澆水東入澗者固不合也因謂補正水經之

言不足據考百泉河舊自大厰村東南流入沙河境迤北祝村過段家莊東南入南和縣境之辛莊正所謂源水東入渴者也今大厰村南地勢稍高而舊河形猶有存者其村西北羣地內有大石橋當是其故瀆狼溝小澧二河皆是其支不知何年斷流遂不入沙河界未可以今縣無百泉河便以古人爲非也又考往時沙河北支流入南和縣界百泉河東流與之合謂之澧河是亦澆水東入渴

之明證又未可泥於一邑之地而不求全河之形
遂執今河以辨古說也 又案七里河一統志通
志府志縣志皆謂源出清風嶺考清風嶺在邢臺
縣西南一百五十里其水入於野河俗名路維川
水與七里河無涉方輿紀要七里河在府南七里
流合於百泉亦未及考其源也大陸澤水治圖記
謂百泉河發源府東南葫蘆套黑龍潭考葫蘆套
爲百泉支流黑龍潭在百泉東北入於百泉河者

俱不得謂之河源又邢臺縣志謂七里河合黑龍
潭水爲鴛水順德府志謂達活野狐二泉下流合
併得名考百泉一名鴛鴦水今或移之七里河或
移之黑龍潭又或移之達活野狐二泉以合流爲
名夫水合流者多矣何不皆以鴛稱此皆求其說
而不得強爲附會耳郡城南關又有鴛水廟廟內
有井名鴛井志以神爲鴛水郡主尤無稽之甚者
順水河百泉支流也源出邢臺縣之東汪大賢窟澗

永濟重興等十八閘閘中散水積以成川東流自邢臺以及南和河身散漫不復可考自南和縣北之賈宋村北入任縣西北之南甘寨村河流始顯東北流三十里逕大宗村達活河支流自河頭村東流入焉是名河頭溝又東北流十五里逕齊村又北流二十里逕路村入於大陸澤

小澧河百泉河支流也亦名狼溝河今名東狼溝河首起邢臺縣東南十二里之厰里村東流六里順水

溝入焉順水溝亦百泉河支流也又東流六里逕青界村葫蘆套河入焉又東流八里逕善下村入南和縣南境又東流二里逕左村折而東南流三里逕磚瓦固村入於澧河

謹案小澧河與狼溝河東西相距三里舊時西稱狼溝東稱小澧亦稱狼溝乾隆二十三年沙河縣令杜灝修輯縣志皆定名狼溝而以東西別之者西狼溝自邢臺縣南入沙河縣入於沙河東狼溝

自邢臺縣東南入沙河縣又由沙河縣東入南和縣境入於澧河則東狼溝宜仍小澧之名又方輿紀要謂狼溝在南和縣南五里沙洛二河合流以後旁出者謂狼溝河下流仍合於澧河此指東狼溝言則兩河皆名爲狼溝亦未爲非也但以沙洛合流旁出與諸書不同而云下流仍合於澧則與今河形合又引縣志云河兩岸多狼因名南和縣志載明石星朱墓碑云金元之際邑爲戎馬之郊

人烟稀少野松柏陰翳率多虎狼似其名起元
初考太平寰宇記邢州南和縣下列家水在縣西
南一十里下至狼溝河則宋時已有此名矣至小
澧之名亦不知起自何時而東西之稱家屬臆斷
故皆仍其舊又此一河或謂百泉之伏而別見者
亦非也蓋元明之前百泉河由邢臺縣之大厰村
東南逕沙河縣之北屋村入於沙河二河乃其分
支後百泉北徙而一河未移其所以至今不絕者

以大厰村輦地泉源衆多不全恃正河之水故也
豈伏而再見乎

列葭水在南和縣境入狼溝河

漢書地理志列葭水東入澗 太平寰宇記列家
水在南和縣西南十里下至狼溝河

謹案漢書燕刺王傳使人刺葭水台水師古曰葭
音家寰宇記遂改葭作家誤

珍珠泉在白泉東南三里右一泉曰清水重源並發

合而南流又折而東流逕大石橋又折而北流又東
南流入於小澧河

七里河其源有三皆出邢臺縣西山一爲于家溝水
東流逕巡檢司又東流十里逕黃花店俗名下稻畦
川一爲黑龍關馬跑泉水一爲張八斗店溝水二水
會流俗名下漿水川與下稻畦川合流於黃花店又
東流十里逕姚坪伏流地中三十里至城南郭村復
見又東流七里逕西樓下村合百泉河

上河卽葫蘆套水之支流也在葫蘆套東北五里入沙河縣界折而東南流入南和縣界

參珍溝在沙河北由邢臺縣之南東南流入於上河馬跑泉在府城西一百里東流入於七里河

永濟閘渠發源邢臺縣南五里華家庄南帽兒泉東南流二里入於七里河

黑龍閘渠發源邢臺縣東南八里之黑龍潭東流二里入於七里河

小龍眼泉在帽兒泉東一里又東北一里爲大灘泉
俱滙於黑龍潭

明沙閘渠發源邢臺東南八里之明沙泉北流三里
又東北流二里入於七里河自康熙初淤塞久失渠
形乾隆二十六年知府金文淳重開

晉祠閘渠亦名晉祠河發源邢臺縣東南八里之晉
祠村銀沙泉砌坡泉黑泉三水彙流而成東北流三
里入於七里河

溝頭泉俗名狗頭泉在銀沙泉東一里東流入於黑龍闡渠

武莊闡渠發源邢臺縣東南八里武家莊之溝頭泉東南流二里入於七里河

普濟闡渠卽邢臺縣之永濟闡也發源邢臺縣之百泉河流入沙河縣境在上河東二里許南流三里逕呀呼村又東流四里逕善下村入南和縣境仍歸於百泉河

永賴閘渠在普潤閘渠東數十步一名徐旺閘亦百泉河支流南流入沙河縣境東南流三里逕西徐王村又東南流四里逕前徐王村入南和縣境逕張相村又名張相河南流二里仍歸於百泉河

泥溝閘渠亦百泉河支流南流十二里入沙河縣境逕西徐王村又東流二里逕東徐王村入南和縣境仍歸於百泉河

東汪閘渠百泉河支流首起邢臺縣東南十五里東

汪村東南流五里又折而東流五里又折而東北流五里入南和縣界仍歸百泉河

康惠渠首起邢臺縣南十五里之康莊舖又南五里爲沙河縣之九家村二村相接地勢窪下爲四而瀝水所歸適當驛路兩旁開溝溝水無所歸宿往往泛溢道上乾隆二十八年知府金文淳鑿渠繞康莊舖而北長六百六十丈寬一丈至三丈深三尺注之七里河

永濟閘渠百泉河支流首起邢臺縣東南二十里之
永濟閘在曾濟閘渠東南半里許東北流十里入南
和縣界仍歸百泉河

永利閘渠百泉河支流首起邢臺縣東南二十里之
永利閘在永濟閘東南半里許東流四里屈而北流
五里又折而東北流入南和縣界仍歸於百泉河
重興閘渠百泉河支流首起邢臺縣東南二十八里
之重興閘東北流五里入南和縣界仍歸於百泉河

濟民閘渠百泉河支流首起邢臺縣東南二十八里之濟民閘在重興閘南半里許東流二里入南和縣界仍歸於百泉河

廣潤閘渠百泉河支流首起邢臺東南三十里之廣潤閘東南流五里入南和縣界仍歸百泉河

救生閘渠百泉河支流首起邢臺縣東南二十三里之救生閘東南流一里入南和縣仍歸於百泉河

永賴閘渠百泉河支流首起南和縣百泉河南岸之

永賴閘東南流逕張相村鄭家莊西里村

均濟閘渠百泉河支流首起南和縣百泉河之均濟閘在永賴閘東東南流逕崗頭村孔村

安民閘渠百泉河支流首起南和縣西南百泉河南岸之安民閘東流逕邾家莊河郭村西官村

惠民閘渠百泉河支流首起南和縣西百泉河東岸之安民閘北東流逕西官村

永濟閘渠百泉河支流首起南和縣西稍北百泉河

東岸之永濟閘在惠民閘北東流逕台村馬莊三官莊

均惠閘渠百泉河支流首起南和縣西北百泉河東岸之均惠閘在永濟閘北東流逕河郭村西辛寨東辛寨

波漑渠百泉河支流首起南和縣西北百泉河東岸之波漑閘在均惠閘北東流逕河郭村

廣漑閘渠百泉河支流首起南和縣西北百泉東岸

之廣溉閘在波濇閘北東流逕西韓村鄭家莊

通濟閘渠百泉河支流首起南和縣西北百泉河西
岸之通濟閘在廣溉閘西南半里許西北流逕小湖
村薛家屯賈宋村

通惠閘渠百泉河支流首起南和縣西北百泉河東
岸之通惠閘在通濟閘北東流逕張村南師村邵寧
村

邵家閘渠百泉河支流首起南和縣西北百泉河東

岸之邵家閘在惠通閘北東流逕王家莊李家莊小寺村武家莊

通利閘渠百泉河支流首起南和縣北百泉河東岸之通利閘在邵家閘北逕齊家莊北師牧駱駝牧白佛莊

順水溝百泉河支流在那臺縣東南南流入於小澧河

達活河源出順德府治西北五里之達活泉一名蓼

水

〔漢書地理志〕襄國故邢國有蓼水〔金史地理志〕
邢臺有蓼水〔太平寰宇記〕石井岡在龍岡縣西
七里一名龍岡酈道元注水經云蓼水出襄國石
井岡蓼水一名達活水齊文獻通考龍岡縣蓼水
一名達活水

西一泉曰瓦窰東流二百餘武漚爲池廣周數百步
深可一丈澄泓鑑澈碧映鬚眉東南逕郡城北其小

謹案瓦甕泉在邢臺縣西北五里與達活泉並小於達活泉三之二當卽達活泉上源也土人有是稱今仍之

土俗又名牛尾河又東流逕海會橋野狐泉水注之又東流逕高莊橋沙底河入焉一名響泉河以下互受通稱矣又東流四里逕張村又東流十八里逕小呂村百泉河支水北流入焉一爲關家灣閘渠一爲永濟閘渠又東北流十二里逕河頭村入任縣西南

境又東流十八里逕任縣城西其支流東流一十里抵縣城環城爲濠又自西水關入縣城東流逕縣治又東流逕縣文廟又北流出北水關入於城濠滙入正支其正支東北流逕縣城北又曲折東北流二十里逕南留寨入於大陸澤

謹案元史郭守敬傳面陳水利六事其二順德達泉引入城中分爲三渠灌城東地卽達活泉也洧舊聞去鉅鹿郡西北一舍有泉名達活源深流

長廣輪數百步人享其利咸平中刺史柳濬旁植楊柳建亭其上爲一郡之勝熙寧壬子泉忽淪伏不見元豐改元太守王慥禱於泉上不閱月而源出因改名再來泉大陸澤水治圖記謂卽牛尾河郡志任縣志皆謂牛尾河發源府西北之紫金泉考牛尾之名其義未詳舊稱郡城爲臥牛城北有水門通城濠名牛尾河後水門廢豈遂移其名於達活河耶夢溪筆譚謂邢臺城郭進守西山時築

濶六丈可臥牛俗呼臥牛城方輿紀要又謂城東
有牛屋河是城又因河而名也未知孰是又大陸
澤水治圖記謂達活河經邢臺之李道村東北入
任縣地至趙五家塔圪臺有順水河合之系薄村
有蔡馬聖水三河合入至塔圪臺南合百泉達於
滄陽河今河流與前少異矣

野狐泉發源郡城西北十里之野狐岡土人文名營
頭岡其水從石罅中流出匯爲池池中有小泉數十

東南流四里許左則蓮花泊之水注之泊在邢臺西
北八里東南流三里許入於營頭岡之水右則明沙
泉之水注之泉在邢臺縣西北十二里東流六里許
入於營頭岡之水匯而東南流六十里逕國士橋入
於達活河

元遺山文集舊有野狐居此故名 大陸澤水治

圖記達活泉南一泉曰紫金泉從南入郡濠卽牛

尾河也泉北一泉曰野湖泉卽野狐泉三泉匯流總名

達活舊與牛尾同入故亦名牛尾三原統志野狐泉明萬厯中涸時有時無出隱不定

謹案野狐泉土人謂源通白馬河白馬河龍源水旺則此水亦旺大約達活泉左右諸泉皆白馬河之伏而另見者有泉左右諸泉皆七里河之伏而另見者達活百泉則其大者也

沙底河發源邢臺縣西四十里之火石岡東南流十二里逕石頭莊折而東流三十里逕郡城北又名響

水河又東流四里逕高莊橋會達活河

邢臺縣舊志明嘉靖二十七年知縣何岑奉府檄
取九縣人夫濬沙底河自響橋抵蓮花泊廣五丈
深三丈可通舟楫又建石閘九座由蓮花泊通穆
家口年久石圯山水漫淤順治七年知府王忠治
欲復舊制募夫役開濬之雖非昔比然兩岸民田
免於湮沒者多矣

紅花溝在郡城北門外三里西北諸村瀝水南流入

沙底河

護城河環郡城長一千八百五十丈濶四五丈至十二丈深八尺於郡城西北隅建石閘引達活泉注之而河之西南又自有泉數十噴涌而出又於城東建石壩水盈則由壩滾入外河東流入於關灣河注達活河歲久閘廢達活泉水爲沙底河所隔不能流注河內而河內各小泉又皆淤塞時致乾涸乾隆二十八年知府金文淳重濬

外河護城河外重河也環城西南東三而長一千二百九十丈濶五六丈至十丈深五六尺平時乾涸雨則近郡各村瀝水皆匯歸於此河逕東門外匯護城河東流入關灣河注達活河淤塞已久惟西南一面微有河形乾隆二十八年知府金文淳重濬

關灣河卽關家灣閘渠亦卽七里河支流也在郡城東十二里其水由關家灣閘北流逕東汪村大吳村袁家莊王麻村雙橋村淨安村祝村吳稱村南小呂

村凡三十里貫達活河而北又東北流逕北小呂村
大邑村辛興舖蘇家屯王家屯吳村李道村楊村西
大樹村南大樹村張家莊西孫彩孟家莊東孫彩鐵
爐村東大樹村蓋宗村其長五十里入任縣界入於
達活河乾隆二十八年知府金文淳重濬

翟村閘渠達活河支流也在郡城西北三里其水自
閘北流二里穿野狐泉河折而東流會水磨閘渠仍
入於達活河

水磨閘渠一名豫讓閘渠亦達活河支流也在郡城
城北四里其水自水磨閘東北流一里逕翟村會翟
村閘渠又北流六里折而東流又折而東南流會關
家閘渠仍入於達活河

張村閘渠亦達活支流在郡城東八里其水自閘南
流一里逕北張村又折而東流逕南張村又折而北
流逕平石橋仍入於達活河

小呂廟渠亦達活河支流也在郡城東十里其水自

開東流二里達北小呂村又東流二里逕大呂村又東流六里逕李道村會關家閘渠仍入於達活河

馬蘭溝首起邢臺縣西南二里之瓦窰村縣西南諸村瀝水之所滙注也是名西馬蘭溝東行二里許逕郡城南關又東流逕郡城東南隅是名東馬蘭溝折而北行半里許逕南關東街玉皇廟又折而東行二里許逕小梁家莊大梁家莊又東流五里逕七里橋入於關灣河注達活河乾隆二十八年知府金文淳

重洛

洩水溝在邢臺縣東門外以洩護城河外河之水也
東行二里逕辛莊又東行二里逕田家莊又東行三
里逕東康莊又東行二里入關灣河注達活河

普濟閘渠百泉河支流也發源普濟閘東北流十四
里逕雙樓村石井村入於達活河

馬河其上游爲白馬河蓋卽古馮水也源出郡城西
北八十里之凌霄山西山之水有自土門嶺來者由

嶺東北流有自太子崖來者由崖東南流俱逕龍門
峽合流逕青山屈而南流一里逕白楊坡是谷九龍
口伏流地中河身盡成沙磧東行凡三十里逕沙窩
村玉泉河又伏流而東二十里至蓋翁村散漫田野
入任縣境河形迷不可復識矣

漢書地理志襄國縣有蓼水馮水皆東至朝平入
涇 元和郡縣志青山本名黑山以周太祖諱黑
獺故改名青山隋置青山縣 內邱縣志今青山

村卽青山故城

謹案白馬河府志縣志俱謂源出邢臺縣凌霄山
通志謂出內邱縣凌霄山考邢臺之凌霄山在縣
西北七十一里內邱之凌霄山在縣西七十五里
名上凌霄山與邢臺之山別出二說不同又一統
志通志俱以馬河爲卽龍騰水府志任縣志同內
邱縣志謂小馬河發源自龍騰山東流至九里岡
會任莊和莊之水經柳林郊臺爲馬河唐山縣志

分柳林馬河爲一大陸澤水治圖記謂馬河發源
邢臺西山馬嶺川至北蓋宗入任縣境舊由橋頭
尹家莊馮村北留寨入泊因故道迷失自久今隨
水勢自北張南引合聖水河考大陸澤西北有馬
河村村中有橋名馬河橋今土人猶以橋名村蔡
聖柳林諸河皆合流逕此似當以吳說爲是然馬
嶺川在邢臺縣西北五十里其流爲龍門川白馬
河初不發源於此而由蓋宗村入任家則其下流

爲馬河無疑矣今十人以內邱縣之李陽河入唐山任縣境者爲馬河又流俗相傳之譌也又漢志蓼水馮水連稱蓼水卽達活河則馮水卽馬河蓋因字形脫誤遂譌馮爲馬耳今內邱縣有南北中馮村南北大馮村又有馮溝村在城南左相鄉政因馮水得名俱未可知則李陽河之稱馬不得與此河混可知矣

玉泉河發源郡城西北四十五里馬鞍山下山南爲

金泉山北爲玉泉水瑩澈如玉泉上有寺曰玉泉寺
明兵備道陳大賓疏治爲池建亭其上東北流一里
逕黃寺橋又東北流一里入於南溝

南溝首起邢臺縣西北四十里東流一里許與玉泉
水合又東流二十八里至沙窩村入白馬河

蔡河其上流有二皆無泉源在邢臺縣境者首起縣
北三十里之蘭陽岡東流而下有小橋跨其上卽往
來驛路也東北流五里入內邱縣界逕下屯村而東

南流五里復入邢臺縣境又東南流五里逕龐馬村復折而東北流十里逕陳家屯又東北流三里逕東時村之後有小泉二匯流入焉又東北流與內邱縣之蔡河合其在內邱者首起縣西南十里之狐狸村常時無水爲西南山水及各村瀝水之總道東行一里逕馬村又東行八里逕縣南二十五里之梁原店店與邢臺縣蘭陽岡對相去五里而近又東南流三十里逕太平村入邢臺縣境又東流十里與邢臺縣

之蔡河合又東北流入任縣西北境逕張藎村又東
流河形漸微又東流二里河形復顯又東流合於聖
水河又東流八里小馬河自唐山縣東南流入焉又
東流十里逕馬河橋入於大陸澤

謹案蔡河自來莫知其源畿輔通志蔡河在任縣
北十里源出府西山逕邢臺縣之時村入縣界分
爲二一南向環城爲濠一北向東折穿城而出合
濠水東流入聖水河考邢臺縣時村在白馬河北

白馬河又在達活河北若蔡河南向環在縣爲濠則當貫白馬達活二河而始及任縣於水道多不合且環城爲濠北向東折穿城而出者乃達活河非蔡河也明統志達活水流逕任縣爲蔡水合流至南和縣西合於泚水復東北流入任縣境謂之蔡河又東注於灋河明嘉靖三十九年任邑人李景萃重濬城中蔡渠記云蔡水發源達活泉稍東與紫金合蜿蜒紆湍踰三十里爲縣西郭昔人於

此驪為二渠一南向環城為濠一北向東折穿城
 為渠通志之言蓋本李記其實記信即明統志方
 輿紀要所謂達活水入任縣為蔡河者也舊府志
 蔡水自邢臺達活經流任縣前入澧河大濶澤水
 治圖記蔡河發源府北梁原莊之西山經邢臺縣
 之時村村後有泉合入二里許至任縣地合亦理
 水河志修於明初圖記作於

本朝其說已不相合然記所謂合入聖水河者與冷河

形合而其上源迷不可考矣康熙二十六年建蔡河橋碑記云發源於青山考青山在邢臺西北七十里爲白馬河所逕豈卽白馬河之分支故其下流與白馬河並流而東歟今尋其源實有二支在邢臺縣者涓流不絕亦無泉源在內邱縣者止存枯槽大雨時行爲西山一帶瀝水所注二支合於時村而蘭陽岡南五里卽白馬村北五里亦爲白馬河則二縣之水皆白馬分支明矣諸書之說皆

爲失考

聖水河發源任縣西北十五里之聖井村上有廟曰聖母廟井泉湧地而出環廟爲河與蔡河會流而東入於大陸澤

小馬河一名柳林河古龍騰水也源山縣西六十里之龍騰山

太平寰宇記龍騰水在內邱縣七十五里出龍騰山
文獻通考內邱有龍騰水
方輿紀要蓬鵲

山在內邱縣西南六十三里亦名龍騰山龍騰水出焉

九源奇發合流而東名九龍河

謹案龍騰水源出龍騰山者四出鵠山者二出百巖山者二又有胡姑腦泝水河源分流而來者一凡九支合流而下有橋名九龍橋鵠山在龍騰山左百巖山在龍騰山右胡姑腦在龍騰山之西南也

東流十里過九龍屈而南流二里逕柳林村俗名柳
林河又折而西流十五里逕西龐村俗名西龐河又
折而東流五里逕東龐村俗名東龐河又東流十里
逕張駝村分爲二一東南流逕鐵頂墓

內邱縣志鐵頂墓在縣南十三里後趙右侯張賓
墓也周圍皆鐵高三丈餘廣十餘畝石季龍厚葬
以報賓也

凡二十七里入唐山縣西南之邢村內邱縣之南七

里河入焉東北流十二里逕南汪店入任縣西北境
合於聖水河一東南流十八里逕夏侯村散漫不可
復識

謹案小馬河爲古龍騰水諸書無是說以寰宇記
參考地理當是也畿輔通志誤收入平鄉縣下又
於邢州龍岡縣引水經云鵲山有穴出雲母其西
有龍騰溪鶴度嶺太平御覽引水經注曰石勒時
大旱沙門佛圖澄於石井岡掘得一死龍長尺餘

漬之以水良久乃蘇咒而祭之龍騰而上天卽雨
降因名龍岡考今鵲山龍騰水鶴度嶺皆在內邱
縣界寰宇記又云青山本中邱縣地隋於此置青
山縣大業二年省縣爲龍騰府大約皆因此得名
七里河發源內邱縣西南七里之娘子岡以美縣北
里故名逕內邱縣城內又東南流逕黃湓村入唐山
縣境入於柳林河

此又一七
里河也

蔡娘子岡縣志不載志云七里河發源自西邱

田間溝澮之水由永安魯亭逕河村而東至畱村
黃澗村散於田間考北方之田初無溝澮因河漚
沒遂以田間散水爲源志言殊不足據

沙溝水今無考疑卽七里河也

〔太平寰宇記〕源出鵲山東流逕內邱縣北五里

方輿紀要在內邱縣西南源出龍騰山引而東合
於龍騰水東北入唐山縣界合於泚

張耳溝在內邱縣西二十里又名揚武川相傳張耳

水經通志卷之六
大興縣志
練兵處東南流入於小馬河

西寨溝一名南七里河首起內邱縣西之西寨陽村
東南行三里逕黃厰村入於小馬河

李陽河源出內邱縣西北五十里之且停山兩源並
發合而東流三十里逕石河村分爲二雙導並屈而
北流三十里逕內邱縣城西

內邱縣志發源自且停山之東有二焉一自揚武
川北而來一白石河西邱而來會於城西三里

復合爲一折而東南流五里逕李陽村又東流十三里逕河渠舖入唐山縣西境又名馬河

唐山縣志昔人見白馬東行次日水潦隨馬蹄奔流而下遂成河故名

又東南流五里逕高村又東南流二十里逕景福村入任縣東北境又東南流逕牛村羊村入於大陸澤

謹案李陽河發源內邱逕唐山任縣獨流入澤者俗所謂九河八水獨此見遺任縣志亦不載唐山

縣志則謂之馬河府志載於內邱縣而遺於任縣
通志亦取內邱縣志之說考馬河爲邢臺白馬河
之下流唐山縣志似誤今土人猶仍其稱則志所
稱神馬之異或李陽河入唐山縣境復有此異故
以命名歟且河名之同往往有之如達活河名牛
尾而劉累河亦有牛尾之名不足怪也獨是任縣
志所載之馬河卽白馬河下流而獨遺李陽河不
可解而府志之襲誤又無論矣又通志府志任縣

志皆謂龍騰水爲馬河已辨見前而諸志又以李陽河東北入唐山縣境爲散於田間幾似此下無復有河者矣今其河雖就廢而經由之迹尚有可考固未可與白馬之下流蔡河之上源一例廢之也又小馬河發源龍騰山下流入唐山縣爲柳林河李陽河逕唐山縣稱馬河通志府志任縣志合柳林馬河爲一今考馬河在唐山縣城南十里柳林河在城南三十里其源各別其流甚遠志言殊

爲失考

磁窑溝一名笠帽溝又名北七里河首起內邱縣西北十五里之馬峰岡東南流逕史村屯村凡三里半逕內邱縣北七里有石橋跨其上又東南流一里逕北光村入於李陽河

南北溝一名順水溝亦名南河在唐山縣西南八里乾隆十八年新開起自縣治東南流逕崇吳景福等村凡七里入於李陽河

南寺莊溝在南北溝西四里乾隆二十一年新開起自南寺莊東流入於南北溝

黃家營溝在南寺莊溝南二里乾隆二十年開起自黃家營東流入於南北溝

唐家莊溝在黃家營溝南二里乾隆二十年開東流入於南北溝

四楊溝首起內邱縣南之四楊橋其地窪下爲驛路澀水所歸明建橋於此橋東開溝導水東北行其長

一百一十丈八尺年久淤廢乾隆二十八年知府金文淳重開

鷄爪河在大陸澤東北源出大陸澤中之環水村東流七里至邢家灣歸滏陽河其北有溝名小鷄爪皆洩水之路

謹案鷄爪河曲折達邱家灣其盡處卽滏陽河西岸建有石閘名鷄爪閘閘上有碑云向者大陸澤之水由鷄爪河而洩於滏陽及後水勢變遷滏陽

河身淤高水反內溢遇伏秋汛水泛漲起板以洩
澤水倘溢水河發起板分洩溢水

穆家口河雞爪河下流也雞爪河逕穆家口分二支
一東流逕邢家灣入滄陽河一東流入新澧河

二統志雞爪河西北有河名穆家口皆洩大陸澤
水之渠也舊時填淤雍正四年重加修濬河長四
十里築長隄導澤水注之北泊

新澧河卽澧河下流也一名北澧河在大陸澤北起

自穆家口亦名穆家口河北流五里逕崔家莊入隆平縣東南境又北流四十里入寧晉泊全澤之水所由以歸此泊者也

謹案新澧河卽舊滏陽河所行之道也往時澧河至穆家口會滏陽河北入寧晉泊直下天津明嘉靖間發正順二府民夫萬人修浚自穆家口村至羊毛圪塔上下相距四十里卽此河也其時以河爲澧河下流開其舊淤故名新澧又以澧河入任

縣境比縣之內故又以北別之自萬歷二十六年
漳河泛溢由曲周合入滏陽河滏陽河亦決而東
徙此河遂淤於是全澤之水惟憑雞爪一河瀉入
新徙之滏陽河而新滏陽河又日淤高大陸澤水
漫無所歸爲害滋甚雍正四年興修水利乃復修
濬蓋自元郭守敬至此濠河凡四治矣夫自滏不
入澤入澤之水惟濠河爲大濠治而大陸澤無不
治者今新濠河之入隆平界者農人多爲闢蓄水

以灌田河身日窄其流不暢隆民復築長隄於穆
家曰北水發無去路大陸澤遂長爲任忠云 又
案北澧河乾隆二十八年估挑因勸入緩工而止
原秦云任縣之大陸澤南受西南洛澧諸河之水
由北澧滙入寧晉泊爲北泊其北澧河長四十七
里爲兩泊轉輸要道間段淤淺各加濬治以暢下
注估挑面寬六丈底寬三丈深八九尺不等均約
需銀五千六百五十一兩零

石家渠在雞爪河南一里東流抵淦陽河長一里
黃家溝在石家渠南一里東流抵淦陽河長一里
楊家溝在黃家溝南一里東流抵淦陽河長一里
張家溝在大陸澤西北十里東流達於淦陽河長十
里

盧家溝源出雞爪閘自邢家灣穆家口北流入北澧
河

環澤之村十六曰永福曰嶺南曰馬河橋曰薄村曰

王村曰鄭家莊曰穆家莊曰黃家莊曰甄莊曰甯家莊曰尼家莊曰馬家莊曰于監莊曰東盟莊曰路村曰南晉村

澤中之村一曰環水亦名塌圪臺

謹案大陸澤舊時所謂九河入水者蔡馬二河合聖水以歸滏陽百泉合達活以歸滏陽澧河入澧以歸滏陽洛沙俱由石家渠以歸滏陽沛河入澧沛河入馬河牛尾河入順水河順水河入達活程

二寨殷陳溝俱入濃牛家口河入滏是則十七水者罔不歸於滏陽河故滏陽又爲大陸澤之尾閘也 又案舊說九河八水篇中未載者泆泆牛家口三河泆泆二河本入寧晉泊明時或由唐山縣入任縣歸大陸澤今仍皆歸泊牛家口河考大陸澤水治圖記謂漳河支流自曲周縣逕平鄉中義疇入任縣境逕邢家灣入滏陽河府志任縣志取之然其河身在滏陽河東岸並流而北至邢家灣

西入於海於大陸澤無與故於此皆不具載